



## Palermo-Clique

(Pat und Patachon)

Ihr wärdet uns wohl alli kenne  
mir sin d'r Pat und Patachon.  
Tien uns Palermo-Clique nenne,  
bringe Sache voller Schbott und Hohn!!  
D'r Patachon het d'Helge g'macht,  
dass Alles driber härzlig lacht;  
ich aber ha vom Schnitzelbangg —  
gwiis numme Deifelsdangg!!!

Im letschte Jahr hesch nyt ass Saffa,  
an alle Eck' und Aende g'heert.  
Uff Bärn isch All's wo nit will schaffe —  
goh s'Gäld verduble unerheert.  
Me het so fiin die Hienki grupft;  
e Ma si Frau am Aermlu zupft  
und sait: I find, die Sach isch Bluff!  
d'Hauptsach fählt — so ne richtigs — Bierlokal!!

Im B'richt vom Schtrofgericht tuets nie mangle,  
vo lutter Hyrotsschwindelei.  
So Gauner wänn Monete angle —  
mit grosser Schlangefängerei! —  
Dienschtsogge kemme z'hundert hoch —  
wenn s'Gäld au futsch, so hän si doch —  
(will d'Liebi halt macht blind —)  
zuem mindeschte e Kind!! —

Jhr g'sehn do uff däm Kinschtlerhelge,  
e scheene grosse Gartebaag,  
dr hinter ain in Rose schwelge,  
s'kennt sy es isch dr Otti Maag!!  
Uff em Armewäg är Rose kauft,  
damit dr Schatz em nit verdrauft —  
i sag der's, Otti, Du Deifelsnuss!!!  
mach im Felix kai Verdruss!!!

Do uff däm Gäldsagg tuet ain hogge,  
wie-ne Keenig uff sym Tron —!  
Die And're wänn ihm dr «Gips» entlogge,  
will dä isch hit halt d'Religion —  
D'Salutische hän jetz grossi Sorge —  
wie si dr Booth wänn use worge —  
— wo Du nit bisch Herr . . . . .  
isch lutter Lumperei —!!

Aechts Kirsiwasser kasch nit finde —  
uff em «Baimli» het me's g'heert.  
s'Wasser me nit kenn drin ergrinde —  
wo dr Schnapsjud in dr Kirsch yne lärt —!  
— Wenn sälber dr Kanteenligräis —  
im Durenand kai Uuswäg weiss —  
zwische Wasser, Kirsch und Bräntz!!  
dr no sch . . . i uff d'Abschtinänz!!!

Wenn di die beese Maidli logge —  
so bliib nur standhaft wie ne Ma  
denn gly kennsch in dr Tinte hogge,  
z'Leerach me das erfahre kab!!  
Techderschueldiräggtter isch dä Sappermänt —  
und het zum Ungligg no Tämp'ramänt!!  
s'Bescht wär — wenn me mit em e Konsärvedeggel —  
Kaschtrierti dä alt — Herr!!